

studéte sancte et religióse vivere, atque omnipoténti Deo placére, ut grátiam suam possitis acquirere, quam ipse vobis per suam misericórdiam concédere dignétur.

Tum ad singulos ista singulariter dicit :

Clerico.	Ad primam Tonsuram vel	Promóte.
IV. Minoribus initiato.	Ad Minóres Ordines Dic semel septem Psalmos Pœ- nitentiáles cum Litanis, Ver- siculis et Oratióibus.	Promóte.
Subdiacono.	Ad Subdiaconátum vel	Ordínate.
Diacono.	Ad Diaconátum Dic Noctúrnum talis diei.	Ordínate.
Sacerdoti.	Ad Presbyterátum vero Post primam tuam Missam dic tres álias Missas, videlicet unam de Spiritu sancto, áliam de beáta María semper Vírgine, tértiam pro fidélibus Defunctis.	Ordínate.

Et omnipoténtem Deum étiam pro me oráte.

Quod illi devote suscipiunt, et respondent se facturos.

Tum surgit Pontifex, et, amoto faldistorio, convertit se ad cornu Evangelii, ubi, deposita mitra, dicit intelligibili voce : Dóminus vobíscum. Inítium sancti Evangelii secúndum Joánnem. In principio erat Verbum, etc., signat tabellam in qua est Evangelium, aut (si deficiat) signat altare, et se. Mox, acceptis mitra et baculo, prosequitur; factaque Cruci debita reverentia in infimo gradu altaris, revertitur ad sedem vel ad faldistorium, ubi exiit sacris vestibus. Si aliud Evangelium sit dicendum, illud dicit in cornu Evangelii, eoque dicto, recedit, ut dictum est.

Ordinatus etiam ad Presbyteratum dicit idem Evangelium, et in loco convenienti sacras vestes deponit; et cum eo alii ordinati, si forte adfuerint.

## RITUS PONTIFICALIS

### PRO CELEBRANDO SACRAMENTO MATRIMONII.

**A**LTAIRE decentiori pallio coloris albi, tobaleisque mundis ornetur cum tapete super gradus extenso, et pulvinari ad genuflectendum. Paretur quoque faldistorium super ipsum altare, quatuor saltem candelabra cum cereis albis, et Crux in medio illorum.

Paretur etiam abacus sive credentia, super qua erunt vas aquæ benedictæ cum aspersorio; pellicula pro deponendo annulo, dum benedicitur: bugia cum candelâ; Liber hic, sive Rituale Romanum, et si benedicuntur nuptiæ, parentur quoque omnia ad Missam necessaria cum hostiis pro communionem Sponsi, et Sponsæ; velum ante ipsos communionis tempore extendendum: vas cum vino, et mappula pro illorum purificatione: instrumentum ad osculum pacis cum velo coloris ceteris paramentis missalibus uniformis, ad ipsius manubrium appenso.

Super altari in medio: Pluviale cum stola coloris albi, Crux pectoralis, cingulum, alba, amictus, et omnia oblongo ejusdem coloris velo cooperiuntur: mitra auriphrygiata, et velum pro ministro de ea inserviente: et baculus Pastoralis, si eo utatur.

Adsint ad minus quatuor Capellani superpelliceis induti, et duo testes; quorum nomina excipientur in scriptis.

Scribentur etiam in pagella nomina cum Sponsi, tum Sponsæ, quam accedentem ad contrahendum Matrimonium cohonestari decet præsentia parentum vel propinquorum.

His omnibus ordinatis, Pontifex accedit ad altare, aliquantulum orat genuflexus; et si erit Missam celebraturus, accedit ad Sedem si fuerit in Ecclesia propria,

vel ad faldistorium, in cornu Epistolæ altaris paratum, ubi sedens recitat Psalm. *Quam dilécta*, etc., cum suis Capellanis.

Post orationes lavat manus et induitur supra rochetum, vel supra superpelliceum, si fuerit Regularis, amictu, alba, cingulo, Cruce pectorali, stola, et pluviali coloris albi, deinde accipiet formale, si eo utatur, mitram et baculum Pastoralem; ascendit ad altare, quod in medio osculatur. Tum, deposito baculo, sedet super faldistorio, ante medium altaris allato, renibus ipsi altari conversis.

Vocantur Sponsus, et Sponsa, qui debito venerationis actu accedentes coram Pontifice genuflectunt; muliere ad sinistram viri stante.

Pontifex adhuc cum mitra sedens, eos singillatim interrogat coram tribus, vel duobus testibus de consensu in matrimonium; proprio quemque nomine vocans, et patrio sermone alloquens primo virum, mox mulierem, in hunc modum :

*N. volete ricevere N. qui presente per vostra legittima moglie secondo il Rito della Santa Madre Chiesa?*

*Id est : N. vis accipere N. hic præsentem in tuam legitimam uxorem juxta Ritus sanctæ Matris Ecclesiæ?*

*Respondeat Sponsus : Volo.*

*Recepto viri consensu per verbum Volo, vel aliud sensibile signum, mulierem interrogat :*

*N. volete ricevere N. qui presente per vostro legittimo marito secondo il Rito della Santa Madre Chiesa?*

*Hoc est : N. vis accipere N. hic præsentem in tuum legitimum maritum juxta Ritus sanctæ Matris Ecclesiæ?*

*Recepto mulieris consensu, quæ similiter respondere debet : Volo.*

*Nec sufficit consensus unius, sed debet esse amborum; et expressus aliquo signo sensibili, sive fiat per se, sive per procuratorem.*

*Mutuo igitur contrahentium consensu intellecto, Pontifex jubet eos invicem jungere dexteras, dicens :*

*Ego conjungo vos in matrimonium. In nomine Pa ✠ tris, et Fi ✠ lii, et Spíritus ✠ sancti. R. Amen.*

*Vel aliis verbis utatur juxta receptum uniuscujusque provinciæ ritum : postea surgens cum mitra, eos aspergit aqua benedicta. Mox deposita mitra, et ad altare conversus, anulum super pelvícula sibi oblatum benedicat.*

### BENEDICTIO ANNULI.

*V. Adjutorium nostrum in nomine Domini.*

*R. Qui fecit cælum, et terram.*

*V. Domine, exaudi orationem meam.*

*R. Et clamor meus ad te veniat.*

*V. Dominus vobiscum.*

*R. Et cum spiritu tuo.*

OREMUS.

**B**ENEDIC ✠, Domine, anulum hunc, quem nos in tuo nomine bene ✠ dicimus, ut quæ eum gestaverit, fidelitatem integram suo Sponso tenens, in pace et voluntate tua permaneat, atque in mutua charitate semper vivat. Per Christum Dominum nostrum. R. Amen.

*Deinde Pontifex aspergat anulum aqua benedicta in modum crucis : postea iterum sedeat accepta mitra : et tradat anulum benedictum Sponso, qui statim illum ponit in digito annulari sinistrae manus Sponsæ, Pontifice dicente :*

*In nomine Pa ✠ tris, et Fi ✠ lii, et Spíritus ✠ sancti. Amen.*

Tum cantatur, vel legitur sequens Antiphona, Pontifice adhuc cum mitra sedente :

Antiphona.

8 Toni.

Confirma hoc, Deus, quod operátus es in nobis a templo sancto tuo, quod est in Jerúsalem.

ŷ. Glória Patri, et Filio, et Spirítui sancto.

ŕ. Sicut erat in principio, et nunc, et semper, et in sæcula sæculórum. Amen.

Et repetiúr vel legitur Antiphona : Confirma hoc, Deus, quod operátus es in nobis a templo sancto tuo, quod est in Jerúsalem.

Qua repetita, Pontifex, deposita mitra, surgit, et stans versus ad Sponsum et Sponsam, dicit super eos, manibus junctis :

Kyrie eléison. Christe eléison. Kyrie eléison.

Pater noster, etc. secreto.

ŷ. Et ne nos indúcas in tentatiónem.

ŕ. Sed libera nos a malo.

ŷ. Salvos fac servos tuos.

ŕ. Deus meus, sperántes in te.

ŷ. Mitte eis, Dómine, auxilium de sancto.

ŕ. Et de Sion tuére eos.

ŷ. Esto eis, Dómine, turris fortitúdinis.

ŕ. A fácie inimici.

ŷ. Dómine, exáudi oratiónem meam.

ŕ. Et clamor meus ad te véniat.

ŷ. Dóminus vobíscum.

ŕ. Et cum spirítu tuo.

OREMUS.

**R**ESPICE, quæsumus Dómine, super hos fámulos tuos, et institútis tuis, quibus propagatiónem humáni géneris ordinásti, benignus assiste; ut qui te auctóre

jungúntur, te auxiliánte servéntur. Per Christum Dóminum nostrum. ŕ. Amen.

His expletis, si benedicendæ sint nuptiæ, aliquantulum recedentibus in partem Conjugibus, Pontifex parat se ad Missam, ut infra dicetur : sin minus, absoluta supradicta Oratione, iterum sedet, accipit mitram, et gravi sermone alloquitur Sponsum, et Sponsam adhuc coram se genuflexos, admonendo eos, ut sibi invicem fidem servent : Orationis tempore, et præsertim jejuniórum ac solemnitatum, casti permaneant : et vir uxorem, atque uxor virum diligat, et in timore Dei maneant.

Postea, accepto aspersione, surgit, et super eos iterum fundit aquam benedictam.

DE BENEDICTIONE NUPTIARUM.

**S**i, contracto jam Matrimonio, Pontifex celebraturus sit Missam, ut nuptias benedicat, quæ numquam benedicuntur, si mulier sit vidua; post Orationem supradictam, si celebrationi Matrimonii ipse adstitit, descendit ante altare, ubi, depositis mitra, et pluviâli, induit paramenta missalia coloris temporî congruentis.

Si fuerit dies Dominica, vel festum de præcepto, aut occurrat Officium primæ vel secundæ classis, Missa erit de Dominica, vel festo cum commemoratione pro Sponso, et Sponsa : in aliis vero diebus, etiamsi rit. duplicis majoris vel min. Missa erit pro Sponso et Sponsa ex votivis in fine Missalis.

Pontifex legit totam Missam usque ad Pater noster inclusive; quo absoluto, antequam dicat : Libera nos quæsumus Dómine, facta sanctissimo Sacramento genuflexione, convertit se versus Sponsum, et Sponsam,

ante altare genuflexos, et stans in cornu Epistolæ dicit super eos sequentes Orationes, manibus junctis :

OREMUS.

**P**ROPITIARE, Dómine, supplicatióibus nostris, et institútis tuis, quibus propagatióem húmáni géneris ordinásti, benignus assiste : ut quod te auctóre júngitur, te auxiliánte servétur. Per Dóminum nostrum Jesum Christum Filium tuum, qui tecum vivit et regnat in unitáte Spíritus sancti Deus ; per ómnia sæcula sæculórum. *R.* Amen.

OREMUS.

**D**EUS, qui potestáte virtútis tuæ de nihilo cuncta fecisti : qui, dispóitis universitátis exórdiis, hómini, ad imáginem Dei facto, ideo inseparábile mulieris adjutórium condidisti, ut foemíneo córpori de virili dares carne principium, docens, quod ex uno placúisset institui, numquam licére disjúngi. Deus, qui tam excellenti mystério conjugálem cópulam consecrásti, ut Christi et Ecclésiæ Sacraméntum præsignáres in federe nuptiárum : Deus, per quem múlier júngitur viro, et societas principáliter ordináta, ea benedictiône donátur, quæ sola nec per originális peccáti pœnam, nec per dilúvii est abláta senténtiam : respice propítius super hanc fámulam tuam, quæ maritáli jungénda consórtio, tua se éxpetit protectiône muniri : sit in ea jugum dilectiόνis et pacis : fidélis et casta nubat in Christo, imitatrixque sanctárum permáneat foemínarum ; sit amábilis viro suo, ut Rachel : sápiens, ut Rebécca : longæva et fidélis, ut Sara : nihil in ea ex áctibus suis ille auctor prævaricatiónis usúrpet : nexa fidei, mandatisque permáneat : uni thoro juncta, contáctus illicitos fúgiat : múniat infirmitátem suam róbores disciplinæ : sit verecúndia

gravis, pudóre venerábilis, doctrinis cœlestibus erudita, sit fecúnda in sóbole, sit probáta et innocens : et ad Beatórum réquiem, atque ad cœlestia regna pervéniat : et videant ambo filios filiórum suórum, usque in tértiam et quartam generatióem : et ad optátam pervéniant senectútem. Per eúmdem Dóminum nostrum Jesum Christum Filium tuum, qui tecum vivit et regnat in unitáte Spíritus sancti Deus, per ómnia sæcula sæculórum. *R.* Amen.

Tum Pontifex reversus ad medium altaris dicat : Libera nos quæsumus, Dómine, et reliqua more solito ; et postquam sumpserit sanguinem, communicet Sponsos, et prosequatur Missam.

Dicto Benedicámus Dómino ; vel si Missæ illius diei conveniat : Ite Missa est ; antequam populo benedicat, conversus ad Sponsum, et Sponsam coram altari genuflexos, dicit sine mitra, et manibus junctis, sequentem Orationem :

**D**EUS Abraham, Deus Isaac, et Deus Jacob sit vobiscum : et ipse adimpleat benedictióem suam in vobis : ut videátis filios filiórum vestrórum usque ad tértiam, et quartam generatióem : et póstea vitam ætérnam habeátis sine fine, adjuvánte Dómino nostro Jesu Christo, qui cum Patre, et Spíritu sancto vivit et regnat Deus ; per ómnia sæcula sæculórum. *R.* Amen.

Pontifex sedet cum mitra, et eos moneat sermone gravi ut sibi invicem servant fidem : orationis tempore, et præsertim jejuniorum ac solemnitaturn, casti maneant : et vir uxorem, atque uxor virum diligat : et in timore Dei permaneant. Postea surgens eos aspergat aqua benedicta, et, deposita mitra, et dicto Pláceat tibi sancta Trínitas, etc., ex more benedicit subdens : Sit nomen Dómini benedictum, etc., et dat benedictionem more solito : et legit, ut solitum est, Evangelium sancti Joannis : In principio erat Verbum, etc.

Ceterum si quæ Provinciæ aliis, ultra prædictas, laudabilibus consuetudinibus, et cæremoniis in celebrando Matrimonii Sacramento utuntur, eas sancta Tridentina Synodus optat retineri.

---

## RITUS ET FORMULA

ABSOLUTIONIS ET BENEDICTIONIS PONTIFICALIS POST  
HOMILIAM SEU SERMONEM INFRA MISSÆ  
SOLEMNIS CELEBRATIONEM.

**F**INITO sermone, Diaconus qui cantavit Evangelium, conversus ad Episcopum stantem cum mitra, cantabit confessionem in tono prout habetur in Rituali Romano, et dum dicet tibi Pater, et te Pater, si fuerit Canonicus, profunde se inclinabit, si non fuerit Canonicus, genuflectet.

Finita Confessione per Diaconum, Episcopus sedet, et sermocinator, qui in pulpito dum cantatur Confessio genuflectet, surgens publicabit Indulgentiam in forma sequenti, videlicet :

Reverendissimus in Christo Pater et Dóminus, Dóminus N. Dei et Apostólicæ Sedis grátia hujus sanctæ N. Ecclésiæ Episcopus, dat, et concédit ómnibus hic præsentibus quadraginta dies de vera Indulgéntia in forma Ecclésiæ consuéta. Rogáte Deum pro felici statu Sanctíssimi Dómini nostri N. divina Providéntia Papæ N. Dominationis suæ Reverendissimæ, et sanctæ Matris Ecclésiæ.

Publicata Indulgentia, Episcopus, deposita mitra, surget et leget ex libro in tono Orationis versus populum, ut infra :

Précibus et méritis beátæ Mariæ semper Virginis, beáti Michaélis Archángeli, beáti Joánnis Baptistæ, Sanctórum Apostolórum Petri et Pauli, et ómnium Sanctórum, misereátur vestri omnipotens Deus, et dimissis peccátis vestris, perdúcat vos ad vitam ætérnam. *R.* Amen.

Indulgéntiam, absolutiónem, et remissionem peccatórum vestrórum tribuat vobis omnipotens, et miséricors Dóminus. *R.* Amen.

Deinde reassumpta mitra, benedicens populo more consueto, dicet :

Et benedictio Dei omnipoténtis Pa *✠* tris, et Fí *✠* lii, et Spíritus *✠* sancti descéndat super vos, et máneat semper. *R.* Amen.

Si autem erit Archiepiscopus, statim publicata Indulgentia, Capellanus portabit ante illum Crucem, quam genuflexus tenebit, et Archiepiscopus surgens, deposita mitra, prius Cruci caput profunde inclinabit, et deinde adhuc stans prosequetur Précibus, etc. et sic, detecto capite, solemniter benedicet.

---

## RITUS ET FORMULA

BENEDICTIONIS APOSTOLICÆ.

**R**ITUS, et forma, a Patriarchis, Primatibus, Archiepiscopis et Episcopis pro impertienda Benedictione, una cum Plenaria Indulgentia post Missarum solemniam, triplici signo crucis emisso, et in Episcopali throno cum mitra, cæterisque sacris paramentis indutis, circumstantibus ministris, adhibendus, quod congrue de Prælatibus inferioribus intelligatur, talis esse debet.

Expleta in utraque solemnitate Missæ solemnis celebratione, in primis alta voce per ministrum superpelliceo indutum legantur litteræ Apostolicæ, quibus indulgentia Plenaria conceditur, una cum potestate Benedictionem Apostolicam super populum effundendi, ut de delegatione adstantibus constet, et concessio ex latino sermone in vulgarem ad populi intelligentiam translata recitetur. Postea Episcopus surgens, juxta Riturum in Cæremoniali Episcoporum expressum, dicet :

**P**RECIBUS, et méritis beátæ Mariæ semper Virginis, beáti Michaélis Archángeli, beáti Joánnis Baptistæ, et sanctórum Apostolórum Petri, et Pauli, et ómnium Sanctórum.

**M**ISEREATUR vestri omnipotens Deus, et dimíssis ómnibus peccátis vestris perdúcat vos Jesus Christus ad vitam ætérnam. *R.* Amen.

**I**NDULGENTIAM, absolutiónem, et remissionem ómnium peccatórum vestrórum, spátium veræ, et fructuósæ poeniténtiæ, cor semper poenitens, et emendatióem vitæ, perseverántiam in bonis opéribus tribuat vobis omnipotens, et miséricors Dóminus. *R.* Amen.

**E**T benedictio Dei omnipoténtis Pa *✠* tris, et Fi *✠* lii, et Spiritus *✠* sancti descéndat super vos, et máneat semper. *R.* Amen.

Demum post impertitam benedictionem, publicabitur latino, et vernaculo idiomate concessio Plenariæ Indulgentiæ, sequenti formula :

**A**TENTIS facultátibus a Sanctíssimo in Christo Patre et Dómino nostro Dómino *N.* divína providéntia Papa *N.*, in enuntiátis Apostólicis Litteris expréssis, datis Reverendíssimo Dómino Dómino *N.* Dei, et Apostólicæ Sedis grátia hujus sanctæ *N.* Ecclésiæ Antístiti, éadem Dominátio sua Reverendíssima, Summi Pontificis nómine, dat et concédit ómnibus hic præsentibus vere

poeniténtibus, et conféssis, ac sacra communióne refectis Indulgéntiam Plenáriam in forma Ecclésiæ consuéta : rogáte igitur Deum pro felici statu Sanctíssimi Dómini nostri Papæ, Dominatiónis suæ Reverendíssimæ, et sanctæ Matris Ecclésiæ.

## ORDO BENEDICTIONIS AQUÆ

PRO RECONCILIATIONE ECCLESIE AB EPISCOPO FACIENDÆ.

**B**ENEDICTIO hujus aquæ fieri potest omni die. Parantur pro Episcopo faldistorium super tapete, rochetum, stola, et mitra simplex. Insuper, supra mensam tobalea coopertam parantur unum vas cum sale, vas cum aqua benedicenda; vas cum cineribus; et vas vini.

Pontifex ornatus rochetto (vel, si Regularis sit, superpelliceo) assumet stolam, et mitram, deinde prope faldistorium stans cum mitra, aquæ benedictionem ab exorcismo salis incipiens, dicet absolute :

*Ÿ.* Adjutórium nostrum in nómine Dómini.

*R.* Qui fecit cælum, et terram.

**E**XORCIZO te, creatúra salis, in nómine Dómini nostri Jesu Christi, qui Apóstolis suis ait : Vos estis sal terræ; et per Apóstolum dicit : Sermo vester semper in grátia sale sit conditus; ut sancti *✠* ficéris ad reconciliatióem Ecclésiæ, ad expelléndas omnes dæmonum tentatiónes; et ómnibus qui ex te sumpserint, sis animæ et córporis tutaméntum, sánitas, protéctio, et confirmátio salutis. Per eúndem Dóminum nostrum Jesum Christum Filium tuum, qui ventúrus est judicáre vivos et mórtuos, et sæculum per ignem. *R.* Amen.

Deinde, deposita mitra, dicat :

*Ÿ.* Dóminus vobiscum. *R.* Et cum spiritu tuo.

OREMUS.

**D**OMINE Deus, Pater omnipotens, qui hanc grátiam cœlitus sali tribuere dignatus es, ut ex illo possint univêrsa condiri, quæ hominibus ad escam procreásti: béne ✠ dic hanc creaturam salis, ad effugandum inimicum, et ei salubrem medicinam immitte, ut proficiat suméntibus ad animæ et corporis sanitatem. Per Christum Dóminum nostrum. *R.* Amen.

*Tum, assumpta mitra, dicit absolute exorcismum aquæ.*

**E**XORCIZO te, creatúra aquæ, in nómine Dei Pa ✠ tris, et Fi ✠ lii, et Spíritus ✠ sancti, ut repéllas diabolum a término justórum, ne sit in umbráculis Ecclésiæ. Et tu, Dómine Jesu Christe, infunde Spíritum sanctum in Ecclésiám tuam, ut proficiat ad sanitatem córporum animarúmque adorántium te, et magnificétur nomen tuum in géntibus; et increduli corde convertántur ad te, et non hábeant álium Deum, præter te Dóminum solum; qui ventúrus es judicáre vivos, et mórtuos, et sæculum per ignem. *R.* Amen.

*Deinde, deposita mitra, dicit:*

*Ÿ. Dómine, exáudi oratióem meam. R. Et clamor meus ad te véniat. Ÿ. Dóminus vobiscum. R. Et cum spíritu tuo.*

OREMUS.

**D**OMINE Deus, Pater omnipotens, statútor ómnium elementórum, qui per Jesum Christum Filium tuum Dóminum nostrum eleméntum hoc aquæ in salutem humáni géneris esse voluísti, te súpplices deprecámur: ut exaudítis oratióibus nostris, eam tuæ pietátis aspéctu sancti ✠ fices; atque ita ómnium spírituum immundórum ab ea recédât incúrsio, ut ubicúmque fúerit in nómine tuo aspérsa, grátia tuæ benedictiósni advéniat, et mala ómnia, te propitiante, procul recédant.

Per eúmdem Dóminum nostrum Jesum Christum Filium tuum, qui tecum vivit et regnat Deus, per ómnia sæcula sæculórum. *R.* Amen.

*Tum stans sine mitra, dicit super cineres.*

*Benedictio cinerum.*

*Ÿ. Dómine, exáudi oratióem meam. R. Et clamor meus ad te véniat. Ÿ. Dóminus vobiscum. R. Et cum spíritu tuo.*

OREMUS.

**O**MNIPOTENS sempitérne Deus, parce pœniténtibus, propitiáre supplicántibus: et mittere dignéris sanctum Angelum tuum de cœlis, qui bene ✠ dicat, et sancti ✠ ficet hos cineres, ut sint remédium salubre ómnibus nomen sanctum tuum humiliter implorántibus, ac semetipsos pro consciéntia delictórum suórum accusántibus, ante conspéctum divínæ cleméntiæ tuæ facinora sua deplorántibus, vel serenissimam pietatem tuam suppliciter obnixéque flagitántibus; et præsta, per invocatióem sanctíssimi nóminis tui, ut quicúmque eos super se aspéserint, pro redemptiósne peccatórum suórum, córporis sanitatem, et animæ tutelam percípiant. Per Christum Dóminum nostrum. *R.* Amen.

*Tum Pontifex accipit sal, et miscet cineri in modum crucis, dicens:*

**C**OMMIXTIO salis et cineris páriter fiat: In nómine Pa ✠ tris, et Fi ✠ lii, et Spíritus ✠ sancti. *R.* Amen.

*Deinde accipiens pugillum de mixtura salis et cinerum, in modum crucis ter mittit in aquam, qualibet vice dicens:*

**C**OMMIXTIO salis, cineris, et aquæ páriter fiat: In nómine Pa ✠ tris, et Fi ✠ lii, et Spíritus ✠ sancti. *R.* Amen.

*Deinde, stans sine mitra, dicit super vinum.*

*Benedictio vini.*

*Ÿ. Dómine, exáudi oratióem meam. R. Et clamor meus ad te véniat. Ÿ. Dóminus vobiscum. R. Et cum spíritu tuo.*

OREMUS.

**D**OMINE Jesu Christe, qui in Cana Galilææ ex aqua vinum fecisti, quique es vitis vera: multiplica super nos misericordiam tuam: et bene ✠ dicere et sancti ✠ ficare digneris hanc creaturam vini, ut ubicumque fustum fuerit, vel aspersum, divinæ id benedictionis tuæ opulentiā repleatur, et sanctificetur: qui cum Patre et Spiritu sancto vivis et regnas, per omnia sæcula sæculorum. *ñ.* Amen.

Deinde mittit, in modum crucis, vinum in aquam ipsam, dicens:

**C**OMMIXTIO vini, salis, cineris, et aquæ pariter fiat: In nomine Pa ✠ tris, et Fi ✠ lii, et Spiritus ✠ sancti. *ñ.* Amen.

✠. Dómine, exáudi orationem meam. *ñ.* Et clamor meus ad te véniat. ✠. Dóminus vobiscum. *ñ.* Et cum spiritu tuo.

OREMUS.

**O**MNIPOTENS sempitérne Deus, créator et conservátor húmáni géneris, et dator grátiae spirituális, ac largitor æternæ salutis, emitte Spiritum sanctum tuum super hoc vinum cum aqua, sale, et cinere mistum: ut armátum cœlestis defensione virtútis, ad reconciliatiónem Ecclésiæ tuæ proficiat. Per Dóminum nostrum Jesum Christum Filium tuum, qui tecum vivit et regnat in unitate ejúsdem Spiritus sancti Deus, per omnia sæcula sæculórum. *ñ.* Amen.

Expleta oratione, Pontifex, deposita stola et rochetto, vadit in pace.

FINIS.

## INDEX TERTIÆ PARTIS.

<b>D</b> E Publicatione Festorum mobilium in Epiphania Domini ordinata pro anno Domini bissextili. . . . .	1
De Expulsione publice penitentium ab Ecclesia, in Feria quarta Cinerum. . . . .	3
De Reconciliatione penitentium, quæ fit in quinta Feria Cœnæ Domini. . . . .	24
De Officio in Feria quinta Cœnæ Domini, cum benedicatur Oleum Catechumenorum et infirmorum, et conficitur Chrisma. . . . .	47
Ordo ad celebrandam Synodum. . . . .	73
Forma juramenti Synodalis. . . . .	82
Ordo Suspensionis, Reconciliationis, Depositionis, Dispensationis, Degradationis, et Restitutionis sacrorum Ordinum. . . . .	99
Degradationis forma. . . . .	107
Degradatio ab Ordine Pontificali. . . . .	110
Degradatio ab Ordine Presbyteratus. . . . .	112
Degradatio ab Ordine Diaconatus. . . . .	ibid.
Degradatio ab Ordine Subdiaconatus. . . . .	113
Degradatio ab Ordine Acolythatus. . . . .	114
Degradatio ab Ordine Exorcistatus. . . . .	ibid.
Degradatio ab Ordine Lectoratus. . . . .	115
Degradatio ab Ordine Ostiariatus. . . . .	ibid.
Degradatio a prima Tonsura. . . . .	ibid.
Ordo excommunicandi, et absolvendi. . . . .	117
Ordo ad reconciliandum apostatam, schismaticum, vel hæreticum. . . . .	127
De Itineratione Prælatorum. . . . .	134
Ordo ad recipiendum processionaliter Prælatum, vel Legatum. . . . .	137
Ordo ad visitandas Parochias. . . . .	144
Ordo ad recipiendum processionaliter Imperatorem. . . . .	132
Ordo ad recipiendum processionaliter Regem. . . . .	133
Ordo ad recipiendum processionaliter Principem magnæ potentiae. . . . .	137
Ordo ad recipiendam processionaliter Imperatricem, vel Reginam. . . . .	139
Ordo ad recipiendam processionaliter Principissam magnæ potentiae. . . . .	162
De Officio, quod post Missam solemnem pro Defunctis agitur. . . . .	ibid.



De scrutinio serotino, quo antiqui utebantur, antequam Electus in Episcopum consecraretur. . . . .	174
De barba tondenda. . . . .	189
De Officio Psalmistatus. . . . .	190

ADDITAMENTA.

Pontificalis ritus pro Baptismo Parvulorum. . . . .	191
Id. pro Adultorum Baptismo. . . . .	200
Id. pro Confirmationis Sacramento. . . . .	225
De Confirmatione unius. . . . .	230
De Clerico faciendo. . . . .	233
De Minoribus Ordinibus uni tantum conferendis. . . . .	238
De Ordinatione Ostiarii. . . . .	239
De Ordinatione Lectoris. . . . .	241
De Ordinatione Exorcistæ. . . . .	243
De Ordinatione Acolythi. . . . .	245
De Ordinatione Subdiaconi. . . . .	248
De Ordinatione Diaconi. . . . .	257
De Ordinatione Presbyteri. . . . .	265
De Sacramento Matrimonii. . . . .	279
Ritus et Formula Absolutionis et Benedictionis Pontificalis post homil. infra missæ solemnem celebrationem. . . . .	286
Ritus et Formula Benedictionis Apostolicæ. . . . .	287
Ordo Benedictionis aquæ pro Reconciliatione Ecclesiæ. . . . .	289

